

四庫全書

集部

欽定四庫全書

唐詩紀事卷七十五

宋 計敏夫 撰

僧虛中

貫休

僧齊己

殷七七

許碯

許宣平

裴脩然

僧虛中

寄中條司空圖侍郎詩曰門徑放莎垂往來投刺稀有
時聞御札特地掛朝衣嶽信僧傳去天香鶴帶歸他年

二南旨無復更衰微

聞一作開

又云逍遙短褐成一劍動精靈白晝夢仙島清晨禮道
經黍苗侵野逕桑椹汚閑庭肯要爲鄰者西南太華清
圖贈虛中云十年華嶽峰前住只得虛中兩首詩言得
其意趣也

虛中宜春人也遊瀟湘山水與齊己尚顏栖蟾爲詩友
住湘西栗城寺潭州烏氏子希振侍中好事每出迎納
於詩閣虛中好燒火烟昏彩翠去後又復粉飾又題馬
侍郎池亭云嘉魚在深處幽鳥立多時

聽軒轅先生琴云訣妙與功精通宵膝上橫一堂風冷
淡千古意分明坐客神魂凝巢禽耳目傾酷哉商紂世
曾不遇先生

芳草云綿綿芳草綠何處動深思金谷人亡後沙場日
暖時龍鱗藏有瑞風雨洒無私欲採蘭蕪蕪清香可贈
誰

善卷壇云耕荒鑿原時高趣在希夷大舜欲遜國先生
空歛眉五溪清不足千古美無虧縱遣亡淳者何人投

所思

亡溥字傳疑

經賀監舊居云不戀明皇寵歸來鏡水隅道裝汀鶴識
春醉釣人扶逐朵雲如吐成行鴈似驅蘭亭名景在蹤
跡未爲孤

贈屏風巖栖蟾上人云嵩房高且靜住此幾寒暄鹿巖
安禪石猿啼乞食村朝陽生樹罇古道透雲根獨我閑
相覓淒涼碧洞門

泊洞庭云槐柳未知秋依依館驛頭客心俱念遠時雨

自相留浪沒貨魚市帆高賣酒樓夜來思展轉故里在
南州

僧貫休

姓姜氏字德隱婺州蘭溪人錢鏐自稱吳越國王休以
詩投之曰貴逼身來不自由幾年勤苦蹈林邛滿堂花
醉三千客一劍霜寒十四州萊子衣裳宮錦窄謝公篇
詠綺霞羞他年名上凌烟閣豈羨當時萬戶侯鏐諭改
為四十州乃可相見曰州亦難添詩亦難改然閑雲孤

鶴何天而不可飛遂入蜀以詩投王建曰河北河南處
處災惟聞金蜀少塵埃一瓶一鉢垂垂老萬水千山得
得來秦苑幽栖多勝景已歛陳貢愧非才自慙林藪龍
鐘者亦得親登郭隗臺建遇之甚厚建二年召令誦近
詩時貴戚皆坐休欲諷之乃稱公子行云錦衣鮮華手
擎鵲閑行氣貌多輕忽稼穡艱難總不知五帝三皇是
何物建稱善貴倖皆怨之休與齊己齊名有西岳集十
卷吳融爲之序卒死于蜀

休每得句云只堪供養佛故懷贈武昌棲一云風清江
上月霜洒月中砧得句先呈佛無人知此心

休工篆隸初在荊州成中令問其筆法曰此事須登壇
而授詎可草草言之成怒通放黔中因為病鶴詩曰見
說氣清邪不入不知爾病自何來

赤旃壇塔六七級白菡萏花三四枝禪客相逢只彈指
此心能有幾人知石霜問云如何是此心休不能荅石
霜云汝問我荅休即問之霜云能有幾人知

唐末寇亂休避地渚官荆帥高氏優待之館于龍興寺
會有謁宿話時政不治乃作酷吏詞以刺之云霰雨灑
灑風吼如斲有叟有叟暮投我宿吁歎自語云太苛酷
如何如何掠脂幹肉吳姬唱一曲等閑破紅束韓娥唱
一曲錦段鮮照屋寧知一曲兩曲歌曾使千人萬人哭
不惟哭亦白其頭飢其族所以祥風不來和風不復蝗
兮蟻兮東西南北遂離荆門立趨井絡上蜀主陳情之
詩

春山行云重疊太古色濛濛花雨時好山行恐盡流水
語相隨黑壤生紅葉黃猿領白兒因思石橋日曾與道
人期

晚泊湘江懷古云烟浪濛秋色高吟似得隣一輪湘渚
月千古獨醒人岼濕穿花遠風香禱廟頻只應諛佞者
到此不傷神

天台老僧云獨住無人處松龕嶽雪侵僧中九十臘雲
外一生心白髮垂不剃青眸笑更深猶能指孤月爲我

暫開襟

寒夜思廬山賈生云山兄詩僻甚寒夜更何爲覓句如
頑坐嚴霜打不知石膏粘木屐岨栗落冰池近見禪僧
說生涯勝往時

雪夜寄友人云皓彩中宵合開門失所從何年今夜意
共子老孤峰氣射燈花落光侵壁罅濃唯君心似我吟
到五更鐘

苦熱云松桂晝不動陽鳥飛半天稻麻傾結實沙石欲

生烟毒氣仍干扇高枝不立蟬舊山多積雪歸去是何年

途中逢周朴云東西南北路相遇共興衰世獨無知己
子從何處來菊衰芳草在程遠宿烟開儻遇中興主還
應不用媒

題嶧桐律師院云律中麟角者高淡出塵埃芳草不曾
觸幾生如此來聲風吹磬斷杉露滴花開如結林中社
伊余願一陪

言詩云經天緯地物動必是仙才幾處覓不得有時還
自來真風含素髮秋色入靈臺吟向霜蟾下終湏神鬼
哀

休糧僧云不食更何求自由終自由身輕嫌衲重天旱
爲民愁供器誰將去生臺蟻不遊會湏傳此術歸去老
林丘

觀地獄圖云峨峨冰劍閣有樹不堪攀佛手遮不得人
心似等閑周王應未雪白起作何顏盡日空彈指忙忙

塵世間

山居五首云休話喧譁事事難
山翁只合住深山數聲
清磬是非外一箇閑人
天地間綠圃空堦雲冉冉異禽
靈草水潺潺無人爲向君王道
岩桂枝高正好攀

詎是言休即便休
清泠孤坐碧溪頭
三間茆屋無人到
十里松關獨自遊
明月清風宗炳社
夕陽秋色庾公樓
修心未到無心地
萬種千般逐水流

心心心不住
希夷石室嶢岩白髮垂
惜竹不除當路笋

愛松留得礙人枝
焚香開卷雲生砌
捲箔冥心月在池
無限故人頭盡白
不知頭白又何之

自古浮華能幾朝
逝波終日去滔滔
漢王廢苑生秋草
吳主荒宮入夜濤
滿屋黃金機不息
一頭白髮氣猶高
豈知物外金仙子
甘露天香滴毳袍

翠竇烟巖畫不成
桂香瀑沫雜芳馨
撥霞掃雪和雲母
掘石移松得茯苓
好鳥傍花窺玉磬
嫩苔和水汲金瓶
從他人說從他笑
地覆天翻也只寧

經東林寺云白薝蔔花露滴滴碧苾蔔草雨濛濛田地
更無塵一點是何人合住其中

夜夜曲云蟋蟀切切風騷騷芙蓉噴香蟾蜍高孤燈耿
耿征婦勞更深撲落金錯刀

古意云乾坤有清氣散入詩人脾聖賢遺清風不在惡
木枝千人萬人中一人兩人知憶在東溪日花開葉落
時幾擬以黃金鑄作鍾子期

僧齊己

僧齊已有詩名住襄州謁鄭谷獻詩云高名喧省闥雅
頌出吾唐疊巘供秋望無雲到夕陽自封修藥院別下
着僧牀幾夢中朝事久離鴛鴦行谷覽之云請改一字
方可相見經數日再謁稱已改得詩云別掃着僧牀谷
嘉賞結爲詩友還人詩卷云李賀李白遺機杼散在人
間不知處聞君收在芙蓉江日聞鮫人織秋浦金梭剗
剗文離離吳姬越女羞上機鴛鴦浴烟鸞鳳飛澄江曉
映餘霞輝仙人手持玉刀尺寸寸酬君與珠璧裁作霞

裳何處披紫皇殿裏深相覓

後唐明宗太子從榮好作歌詩高輦輦多依附之觀基
詩云看他終一局白却少年頭

齊己中秋詩云東林莫礙漸高勢四海正看當路時從
榮果謀不軌唱和者言涉嫌疑皆就誅惟齊己得荆帥
高令公匿而獲免

中秋月云空碧無雲露濕衣衆星光外湧清規東樓莫
礙漸高勢四海待看當路時還許分明吟皓魄肯教幽

暗取丹枝可憐半夜嬋娟影正對五侯殘酒卮

早行云舟子相呼起長沙未五更幾看星月在猶帶夢
魂行鳥亂村林迫人喧水柵橫蒼茫平野水慚愧遠峰
名

詠鴈云瀟湘水暖全迷鶴邏沙川寒只有鴈誰向孤舟
憶兄弟坐看連鴈渡橫橋

詠鶯云何事經年悶好音暖風催出轉喬林羽毛新刷
陶潛菊喉舌初調叔夜琴怕雨並栖紅杏密避人雙入

綠楊深曉來枝上千般語似共桃花訴舊心

夏日草堂作云沙泉帶草堂紙帳卷空床靜是真消息
吟非俗肺腸園林坐清影梅杏嚼紅香誰住原西寺鐘
聲送夕陽

寄方干處士鑑湖舊居云賀監舊山川空來近百年聞
君與琴鶴終日在漁船島露深秋石湖澄半夜天雲門
幾回去題徧好林泉

寄錢唐羅給事云嘖嘖嘔譏書無人誦子虛傷心天佑

末搔首懿宗初海樹青叢短湖山翠點踈秋濤看足否
羅刹石邊居

戊辰歲湖中寄鄭谷郎中云白髮久慵簪常聞病亦吟
瘦應成鶴骨閑想似禪心上國楊花亂滄洲荻笋深不
堪思翠蓋西望獨沾襟

劍客云拔劍遶殘罇歌終便出門西風滿天雪何處報
人思勇死尋常事輕讐不足論翻嫌易水上細碎動離
魂

歸鴈云塞門春亦暖連影起巔風雲夢千行去瀟湘一
夜空江人空舉網虜將又虛弓莫失南來伴衡陽樹即

紅

東林作寄金陵知己云十八賢真在時來拂榻看已知
前事遠更結後人難泉滴勝清磬松香掩白壇憑君聽
朝貴誰欲厭簪冠

山寺喜道士至云閏年春過後山寺始花開還有無心
者閑尋此境來鳥幽聲忽斷茶好味重迴知住南岩久

冥心坐綠苔

老將云破虜與平戎曾居第一功
明時不用武白首向秋風
馬病霜飛草弓閑鴈過空
兒孫已成立膽氣亦英雄

聞貫休下世云吾師詩匠者真箇
碧雲流爭得梁太子重為文
選樓錦江新塚樹嫠女舊山秋
欲去焚香禮啼猿哭阻修

登祝融峰云猿鳥共不到我來身
欲浮四邊空碧落絕

頂正清秋宇宙知何極
華夷見細流壇西獨立久白日
轉神州

贈孫生云見君詩自別君是繼
詩人道出千途外功爭一字新
寂寥中影迹霜雪裏精神待折
東堂桂歸來更苦辛

邊上云漢地從休馬邊人自牧
羊都來消帝道渾不用兵防草
上孤城白沙翻大漠黃秋風起
邊鴈一一向瀟湘

行路難云下浸與高盤不爲行路難是非真險惡反覆
作峰巒漆媿同時黑朱慚巧處丹令人畏相識欲畫白
雲看

觀水云范蠡東浮濶靈均北泛長誰知遠烟浪別有好
思量故國門前急天堦照裏忙難收樓上興渺漫正斜
陽

聽李先生琴云仙子弄瑤琴仙山杉月深此聲含太古
誰聽到無心洒石霜千片噴空瀑萬尋何人傳指法携

向海中岑

寄陸龜蒙云萬卷功何用徒稱處士休閒歌太古石醉
聽洞庭秋道在誰開口詩成自點頭中間欲相訪尋便
阻戈矛

自題云禪外求詩妙年來鬢已秋未曾將一字容易謁
諸侯掛夢山皆遠題名石盡幽敢言梁太子傍採碧雲
流

聽泉云落石幾萬仞冷聲飄遠空高秋初雨後半夜亂

山中祇有照壁月更無吹葉風
昔曾廬岳聽到曉與僧同

宿簡寂觀云萬壑雲霞影千峰松桂聲
如何教下士容易信長生月共虛無白香和沆瀣清
閑尋古廊盡記得列仙名

觀燒云獵獵寒蕪引乘風勢不還放來應有主焚去到
何山焰入空濛裏烟飛蒼莽間石中有良玉惆悵但傷
顏

齊己本姓胡名得生詩名多在湖湘間與鄭谷為詩友

殷七七

殷七七名文祥周寶舊於長安識之及寶移鎮浙西七
七忽至寶禮貌益勤每醉吟曰琴彈碧玉調爐養白
硃砂解造逡巡酒能栽頃刻花鶴林寺杜鵑花云貞元
中外國僧自天台鉢盂中以藥養其根來植於此寺僧
飾花院或見女子遊花下或謂花神也一日寶謂七七
曰鶴林寺花天下奇絕嘗聞能開頃刻花可開於重九

乎曰可乃前二日往鶴林寺宿中夜女子謂七七曰妾
爲上玄命下司此花非久即歸閬苑今與道者開之來
日晨起寺僧訝花漸拆至九日爛熳後經兵火其花遂
亡

許碣

碣遊江淮間常醉吟曰閬苑花前是醉鄉踏翻王母九
霞觴羣仙拍手嫵輕脫謫向人間作酒狂

碣自稱高陽人少爲進士累舉不第後得道於蛾眉山


許宣平

新安人也常掛一花瓢及曲竹枝醉則歌曰負薪朝出
賣沽酒日西歸路人莫問歸何地穿白雲行入翠微好
事者題于壁李白自翰林出東遊覽詩嘆曰仙人也

裴脩然

唐道士裴脩然楚州刺史思訓之子為人詼諧強學不
成一名好詩酒善丹青解絲竹開元中嘗夜醉卧街犯
禁乃為詩曰遮莫齷齪動須傾滿滿盃金吾如借問但

道玉山顏官不罪之也出張彥遠名畫記



唐詩紀事卷七十五

欽定四庫全書

集部

唐詩紀事卷

七十六至
八十一

詳校官監察御史臣沈孫璉

主事銜臣徐以坤覆勘

覆校官中書臣呂雲棟

校對官原任典簿臣郭祚城

謄錄監生臣楊其梓

欽定四庫全書

唐詩紀事卷七十六

宋 計敏夫 撰

僧太易

僧惟審

僧滄浩

僧良義

僧志定

僧栖蟾

僧曇翼

僧清塞

僧無悶

僧文益

僧修睦

僧景雲

僧太易

贈司空拾遺云侍臣何事辭雲陞江上微吟見雪花望
闕未承丹鳳詔開門空對野人家陳琳草奏才還在王

繁登樓興不賒高館更吟塵外客仍令歸路待瑤華

僧惟審

賦得聞晚鶯啼云卷簾清夢後芳樹引流鶯隔葉傳春
意穿花送曉聲未調雲路翼空負桂林情莫盡關西興
羈愁正厭生

別友人云一身無定處萬里獨銷魂芳草迷歸路春衣
滴泪痕幾時休旅食向夜宿江村欲識異鄉苦空山啼
暮猿

春日旅懷呈知己云生涯萬事有蒼蒼應任流萍便越
鄉春水獨行人漸遠故園歸路夜空長一聲隔浦猿啼
夜數滴驚心淚滿裳不為知音皆鮑叔信憑江上去茫
茫

僧滄浩

留別嘉興知己云一座東林寺從來未下山不因尋長
者無事到人間宿雨愁為客寒禽散未還空懷舊山月

童子誦經閑

此詩已載
僧皎然下

僧良義

秋山答盧鄴云風泉只向夢中聞身外無餘可寄君當
戶一輪唯曉月挂簷數片是秋雲右張為取此詩於主
客圖

僧志定

唯有罇前今夜月當時曾照墮樓人句梧桐葉老蟬聲
死一夜洞庭波上風句右張為取作主客圖

僧栖蟾

再宿京口禪院詩云灘聲依舊水溶溶
岼影參差對梵宮
楚樹七回凋舊葉
江人兩至宿秋風
蟾蜍竹老搖踈白
菡萏池乾落碎紅
多病支郎念行止
曉來生計轉如蓬

牧童云牛得自由騎
春風細雨飛青山
青草裏一笛一簑衣
日出唱歌去月明撫掌歸
何人得似爾無是亦無非

短歌行云蟾光堪自咲
浮世懶思量
身得幾時活
眼開

終日忙千門無壽藥一鏡有愁霜早向塵埃外光陰任
短長

宿巴江云江聲五千里瀉碧急於弦不覺日又夜爭教
人少年一汀巫峽月兩岼子規天山影似相伴濃遮到
晚船

遊邊云邊雲四顧濃飢馬咬枯叢萬里八九月一身西
北風戍營天正黑戰馬雪多紅昨夜東歸夢挑開晚色
中

寄南岳元泰布衲云曹溪入室人終老甚孤羣四十餘
年內青山與白雲松和巢鶴看果共野猿分海外僧來
說高名自小聞

僧曇翼

招隱詩云連峰數千里修林帶平津雲起遠山翳風至
萑荒榛茅茨隱不見鷄鳴知有人躡蹬踐其跡處處見
遺薪乃知百代下固有上皇民

僧清塞

贈王道士云藥力資蒼鬢應非舊日身一為嵩岳客幾
奠洛陽人冰縫瓢探水雲根斧斷新闕西往來熟誰得
水銀銀

山舍秋思云一從雲水住曾不下西岑故水故園在秋
庭秋葉深泉流通井脉蟲響出墻陰靜夜更聲徹寒燈
獨自吟

早秋別盧玄休云此別經歲久唯約半夜回野渡人初
過前山雪未開鴈羣逢曉斷秋色映春來是夜蘆花宿

嚴家有釣臺

贈幻羣法師云北京從別後南越幾聽砧住久白髭出
講長黃葉深香連隣舍像磬徹遠巢禽寂寞應關道何
人見此心

送耿逸人南歸云南行隨越僧舊業一池菱兩鬢已如
雪五湖歸挂罾夜濤鳴柵鎖寒葦露船燈此去應無事
却來期未能

辭姚合云波濤千里隔抱疾亦相尋會宿逢高燒辭歸

值雨淋叢桑山店迥孤燭海船深尚有重來計知無省
閣心

早秋至郭勁書齋云暑消崗舍清閑坐有餘情石水生
茶味秋風減扇聲遠雲收海雨靜角揜山城此地秋吟
苦時來遶菊行

送晏上人云絕頂無禪侶長懷落髮師齋歸門掩雪講
徹樹生枝沙井泉燈疾秋鐘韻盡遲將行誰請住又爽
禁城期

送康沼歸建業
雲南朝秋色滿歸去思何如
帝業空城在民耕壤塚多月明
臺獨上栗綻寺頻過籬下西江闊
相思見白波

贈栢岩禪師
云野寺絕依念空山曾徧行
老來披衲重病起讀經生
乞食嫌村遠尋溪愛路平
多年栢岩住不記栢岩名

贈胡僧
云瘦影無血色草履着從穿
閑語似持呪不眠同坐禪
背經來漢地袒膊過冬天
情性人難會遊方應

信緣

贈絕粒僧云一齋難過日況復更休糧養力時行道聞鐘不上堂唯留煨藥火不寫化金方舊有山厨在從僧

請作房

晚秋江館云病寄西州居帶城傍門高柳一蟬鳴澄江月上見魚擲荒徑葉乾聞犬行越嶠夜無侵閣色寺鐘涼有隔原聲故園賣盡休歸去湖水秋來空自平

贈李道士云布褐高眠石竇春迸泉多濺黑紗巾昂頭

說易當閑客落手圍碁對俗人自筭天年窮甲子誰同
雨夜守庚申擬歸太華何時去他日相逢乞藥銀

秋日同朱慶餘懷少室舊隱云曾居少室黃河畔秋夢
長懸未得迴扶病十年離水石思歸一夜隔風雷荒齋
幾度曾眠起晚菊頻經塵路來燈下此心誰共說傍松
幽逕幾多苔

宿隱靜寺云一宿五峰孟渡寺虛廊中夜磬聲分疎林
未落上方月幽澗忽生平地雲高鳥背泉生靜景遠人

當燭想遺文暫來此地歇勞足望斷故園滄海濱

湘漢懷傑公云一宿空山聽急流仍同賈客坐孤舟遠
書來隔巴陵雨雙鬢去驚彭蠡秋不擬為身謀舊業終
求斷穀隱蒿丘吾宗尚作無慘者中夜廢吟生旅愁

重陽詩云雲木疎黃秋滿川茱萸風裏一樽前幾回為
客逢佳節曾見何人再少年霜報征衣冷針指鴈驚幽
隱泣雲泉古來醉樂皆難得留取窮通委上天師東洛
人姓周氏少從浮圖法遇姚合而返初易名賀初與賈

長江無可齊名賀哭栢岩師云林逕西風急松枝講鈔
餘凍髭亡夜剃遺偈疾時書地燥焚身後堂空卧影初
此時頻泪下曾省到吾廬時島亦有詩云苔覆石床新
師曾過幾春寫留行道影焚却坐禪身塔院闕松雪房
廊鎖露塵自嫵雙泪下不是解空人時謂相侔云兩鬢
已垂白五湖歸釣魚句夜濤驚柵鎖寒葦露船燈句谷
水生茶味林風減扇聲句香連隣舍像磬徹遠巢禽句
伊流背行客岳響答清猿句右張為取作主客圖

唐有周賀詩即清塞也

秋宿洞庭云洞庭初葉下旅客不勝愁明月天涯夜青
山江上秋一官成白首萬里寄滄洲只被浮名繫寧無
愧海鷗

巴陵秋思云揚州已寒色楚田方刈禾歸心病起切敗
葉夜來多細雨城蟬噪夕陽嶠客過故鄉餘業在杳隔
洞庭波

岳陽樓云平楚起寒色杪秋猶未還世情何處淡湘水

向人閒空翠隱高鳥夕陽歸遠山孤舟萬餘里惆悵洞

庭間

三詩作
周賀

方干滌上懷賀云就枕忽不寐孤懷興嘆初南燕收舊
厯上苑絕來書暝雪細聲積晨鐘寒韻疎侯門昔彈鋏
曾共食無魚

僧無悶

暮春送人云折柳亭邊手重携江煙淡淡草萋萋杜鵑
不顧離人意更向落花枝上啼

寒林石屏云草堂無物伴身閑唯有屏風枕簟間本向他山求得石却於石上看他山

僧文益

看牡丹云擁毳對芳叢由來趣不同髮從今日白花是去年紅艷色隨朝露馨香逐晚風何須待零落然後始知空

觀木平和尚云木平山裏人貌古年復少相看陌路同論心秋月皎懷衲線非蠶助歌聲有鳥城闕今日來一

謳曾已曉

僧修睦

秋日閑居云是事不相關誰人似此閑
卷簾當白晝移榻對青山野鶴眠松上
秋苔長雨間嶽僧頻有信昨日得書還

宿岳陽開元寺云竟夕凭虛檻何當興
歎頻往來人自老今古月長新風送沉
漁唱松疎露鶴身無眠鐘又動幾客在
迷津

雪中送人北遊云然知心去速其奈雪飛頻莫咲無危
道雖平更陷人遠郊光接漢曠野色通秦此去迢迢極
却回應過春

送邊將云人盡有離別而君獨無嗟言將身報國敢望
祿榮家戰思風吹野鄉心月滿沙歸期定何日塞北樹
無花

睡起作云長空秋雨歇睡起覺精神看水看山坐無名
無利身偈吟諸祖意茶碾去年春此外誰相識孤雲到

砌頻

賣松者云求利有何限將松入市來直饒人買去也向
柳邊栽細葉猶粘雪孤根尚惹苔知君用心錯舉世重
花開

落葉云雨過閑田地重重落盡紅翻思向春日肯信有
秋風幾處隨流水河邊亂暮空祇應松自立而不與君
同

落花云一片又一片等閑苔面紅不能延數日開亦是

春風公子歌聲歇詩人眼界空遙思故山下經雨兩三
叢

題田道者院云入門空寂寂真個出家兒有行鬼不見
無心人謂痴古岩寒栢對流水落花隨欲別一何懶相
從所恨遲

題東林云欲去不忍去徘徊吟遠廊水光秋淡蕩僧好
語尋常碑古苔文疊山晴鐘韻長翻思南岳上欠此白
蓮香

思齊已上人云同人與流俗相謂好襟靈有口不他說
長年自誦經水聲秋後室山色晚來庭客問脩何法指
松千歲青

送玄泰禪師云去去何住一盂無一瓶水邊寒草白
鳥外晚峰青宿處林聞虎行時天有星回期誰可定浮
世重看經

三生石云聖迹誰會得每到亦徘徊一尚不可得三從
何處來清宵寒露滴白晝野雲隈應是表靈異凡情安

可猜

景雲

老僧云日照西山雪老僧門始開凍瓶粘柱礎宿火陷
爐灰童子病歸去鹿麋寒入來齋鐘知漸近枝鳥下生
臺

溪叟云溪翁居處靜溪鳥入門飛早起釣魚去夜深乘
月歸露菰米熟烟煖荇絲肥瀟洒塵埃外扁舟一草
衣

畫松云畫松一似真松樹且待尋思記得無曾在天台
山上見石橋南畔第三株

岑參有偃師東與韓樽同詣景雲上人即事云山陰老
僧解楞伽潁陽歸客遠相過烟深草濕昨夜雨雨後秋
風渡漕河空山終日塵事少平郊遠見行人小尚書磧
上黃昏鐘別駕渡頭一歸鳥

唐詩紀事卷七十六

欽定四庫全書

唐詩紀事卷七十七

宋 計敏夫 撰

僧栖一

僧可止

僧卿雲

僧處默

僧澹交

僧若虛

僧僧巖

僧曇域

僧懷楚

僧懷浦

僧慕幽

僧尚顏

僧善生

僧栖一

垓下懷古云緬想咸陽事可嗟楚詞哀怨思無涯八千

子弟歸何處萬里鴻溝屬漢家
弓指陣前爭日月血流
垓下定龍蛇拔山力盡烏江水
今古悠悠空浪花武昌
懷古云戰國城池盡悄然
昔人遺迹遍山川笙歌罷吹
幾多日臺榭荒涼七百年
蟬響夕陽風滿樹鴈橫秋島
雨來天傷嗟世事如流水
空見蘆花一釣船

僧可止

贈楚川長老云瘦顏顴骨見
滿面雪毫垂坐石鳥疑死
出門人謂癡照身潭入楚
浸影檜生隋太白曾經夏清

風涼四肢

哭賈島云燕生松雪地蜀死塋山根詩僻降今古官卑
悞子孫塚欄寒月色人哭苦吟魂暮雨滴碑字年年添
蘇痕

送僧云四海無拘繫行心興自濃百年三事衲萬里一
枝筇夜減當時影春消過雪蹤白雲深處去知宿在何
峰

寄麥積山會如長老云默然如大道塵世不相關青檜

行時靜白雲禪處閑貧高一生行病長十年顏夏滿期
游寺尋山又下山

雪十二韻云落處咸過尺脩然物像淒瑞凝金殿上寒
甚玉闕西潤比江河普明將日月齊凌雲花頂膩鎖徑
竹梢低出谷樵人怯歸林野鳥迷煮茶融破練磨墨染
成驚陷兔埋平驛和魚凍合溪入樓消酒力當檻寫詩
題道路依憑馬朝昏委託鷄洞深獮作族松亞鶴移栖
及夏清岩穴經春溜石梯豐年無泰國天道育黔黎

山居云雪消春力展花湯洞門垂果長纖枝曲嵒朋直
道移重猿圍淺井闢鼠下踈籬寒食煙微有高風勢徹
陂

僧卿雲

秋日江居閑詠云寄居江島邊閑詠見秋殘草白牛羊
瘦風高獺鳥寒檢方醫故疾挑薺脩中餐時復停書卷
鋤沙種木蘭

送人游塞云去去玉關路省君曾未行塞深多伏寇時

靜欲屯兵雪每先秋降花常近夏生閑陪射雕將應到
受降城

長安言懷寄沈彬侍郎云故園黎嶺下歸路接天涯生
作長安草勝為邊地花鴈南飛不到書北寄來賒堪羨
神仙客青雲早致家

舊國里云舊居黎嶺下風景近炎方地暖生春草家貧
覺歲長石房雲過濕松逕雨餘香日久覺無事詩書聊
自強

僧處默

題聖果寺云路自中峰上盤迴出薜蘿到江吳地盡隔
岼越山多古木叢青靄遙天浸白波下方城郭近鐘磬
接笙歌

山中作云簾簾高挂枕高欹門掩垂蘿蘸碧溪閑把史
書眠一覺起來山月過松西

螢云熠熠與娟娟池塘竹樹邊亂飛如拽火成聚却無
烟微雨洒不滅輕風吹欲然昔時書案上頻把作囊懸

遠烟云靄靄前山上凝光滿薜蘿高風吹不盡遠樹得
偏多翠與晴雲合輕將淑氣和正堪流野目朱閣意如
何

送僧遊西域云一盂無一錫祇此度流沙野性難為客
禪心即是家寺投雲嶠雪路入曉天霞自說遊諸國回
應歲月賒

憶廬山舊居云簾衣攜食老烟霞勉抱衰顏惜歲華獨
鶴祇為山客伴閑雲常在野僧家叢生嫩蕨沾松粉自

落乾薪帶蘚花明月清風舊相識十年歸恨可能賒
題栖霞僧房云名山不取買山錢任創花宮近碧巔松
桂老依雲裏寺樓臺深鎖洞中天風經險嶂迴踈雨石
倚危屏掛落泉欲結茅庵共師坐肯饒多少薜蘿煙
織婦云蓬鬢蓬門積恨多夜闌燈下不停梭成纈猶自
賠錢納未直青樓一曲歌

僧淡交

病後作云未得身亡法此身終未安病腸猶可洗瘦骨

不禁寒藥少心神餌經無氣力看悠悠片雲質獨坐夕陽殘

寫真云圖形期自見自見却傷神已是夢中夢更逢身
外身水花凝幻質墨彩染空塵堪笑余無爾俱為未了人

効古云榮辱又榮辱一何翻與覆人生百歲中孰肯死
前足玄鬢忽如絲青叢不再綠自古爭名徒黃金是誰
祿

僧若虛

樂真觀云樂氏騎龍上碧天東吳遺宅尚依然悟來大道無多事真後丹元不直錢老樹夜風蟲咬葉古垣春雨鮮生孰松傾烏死桑田變華表歸鄉未有年

懷廬山舊隱云九疊嵯峨倚着天每隨寒瀑下岩烟深秋猿鳥來心上夜靜杉松到眼前書架想遭苔蘚裹石窓應被薜蘿纏一枝筇杖遊江北不見爐峰二十年

古鏡云軒后洪爐獨鑄成蘚痕磨落月輪呈萬般物像

皆能鑒一箇人心不可明匣內乍開鸞鳳活臺前高掛
鬼神驚百年肝膽堪將比只怕頻看素髮生

僧僧戀

蜀中送人遊廬山云君遊正值芳春月蜀道千山皆秀
發溪邊十里五里花雲上三峰五峰雪君上匡山我舊
居松蘿拋擲十年餘君行試到山前問山鳥只今相憶
無

牧童云牧童見人俱不會盡看芒屨戴簑笠朝陽未出

衆山時露滴簑衣猶半濕二月三月時平原草初綠三
箇五箇騎羸牛前村後村未放牧笛聲纔一舉衆稚齊
歌舞看看白日又西斜各自騎牛又歸去

逢老人云路逢一老翁兩鬢白如雪一里二里行四回
五回歇

僧曇域

宿鄭諫議山居云堂開星斗邊大諫採薇還禽隱石中
樹月生池上山涼風吹詠思幽語隔禪關莫擬歸城計

終防此地閑

懷齊已云鬢髯秋景兩蒼蒼靜對茅齋一炷香病後身心俱澹薄老來朋友半凋傷峨眉山色侵雲直巫峽灘聲入夜長猶喜深交有支遁時時音信到松房

贈島雲禪師云遠庵枯葉滿羣鹿亦相隨頂骨生新髮庭松長舊枝禪高太白月行出祖師碑亂後潛來此南人總不知

僧懷楚

謝友人見訪留詩云軒車誰肯到泉石自相親暮雨凋
殘寺秋風悵望人庭新一片葉衣故十年塵賴有瑤華
贈清吟愈病身

送新平故人云遠聽鶻鷁思舊友又因蝴蝶夢生涯一
千餘里河連郭三十六峰寒到家陰島宜分東曉鴈晴
樓高入上陽鴉姜原廟北與君別應咲薄寒悲落花

僧懷浦

贈智丹三藏云壯歲心難伏師心伏豈難尋常獨在院

行坐不離壇嶽雪當禪暝松聲入呪寒更因文字外多
把史書者

初冬旅舍早懷云枕上角聲微離情未息機夢回三楚
寺寒入五更衣月沒栖鳥動霜晴凍葉飛自慙行役早
深與道相違

僧慕幽

冬日淮上別文上人云家國各萬里同吟六七年可堪
隨北鴈迢遞向南天水共行人遠山將落日連春淮有

雙鯉莫忘尺書傳

酬和友人見寄云勞歌好自看終久偶齊桓五字若教
易一名爭得難侵窻紅樹老蔭砌雪花殘莫効齊僚屬
東歸剪釣竿

劍客云去住知何處空將一劍行殺人雖取次為事愛
公平戰立嗔髭鬚星流忿眼睛曉來湘市說拂署別遼
城

柳云今古憑君一贈行幾回折盡復重生五株斜傍淵

明宅千樹低垂大尉營臨水帶烟藏翡翠倚風兼雨宿
流鶯隋皇堤上依依在曾惹當時歌吹聲

燈云鐘斷危樓鳥不飛熒熒何處最相宜香然水寺僧
開卷筆寫春幃客著詩忽爾思多穿壁處偶然心盡斷
纓時孫康勤苦誰能念少減餘光借與伊

三峽聞猿云誰向茲來不恨生聲聲聲是斷腸聲七千
里外一家住十二峰前獨自行嶂雨晚藏神女廟蠻煙
寒鐮夜郎城憑君且莫哀吟好會待青雲道路平

僧尚顏

言興云矻矻被吟牽因師賈閬仙江山風月處一十二年雅頌在於此浮華致那邊猶慚功未至謾道近千篇

懷陸龜蒙處士云布褐東南隱相傳繼謝敷高譚夫子道靜看海山圖事厄傷心否甚逢敵手無關中花數內獨不見菖蒲

寄方干處士云格外綴清詩詩名獨得知閑居公道日

醉卧牡丹時海鳥和濤望山僧帶雪期仍聞稱處士聖
主肯相違

送陸肱入關云舟行復陸行始得到咸京准擬何人口
吹噓六義名亂山逢減翠叢菊早含英衣錦還鄉日他
時有此榮

早春送人歸岳陽云久食主人魚春來復舊居遠無千
里浪輕有半船書過片晴雲淡消殘暮雪虛岳陽多異
境搜思勿令踈

寄劉逸士云無愁無累者偶向市朝遊此後乘孤艇依
前入亂流高眠歌聖日下釣坐清秋道不離方寸而能
混俗求

寄陳陶處士云鍾陵城外住喻似玉沉沉道直貧嫵殺
神清語亦低雪深加酒債春盡減詩題記得曾邀宿山
茶又更携

僧善生

送玉禪師云飄然無定跡迥與律乘違入郭隨緣住思

山破夏歸孟肇數家飯衲乞幾人衣洞了曹溪旨寧輸俗者機

送智光之南值雨云結束衣囊了炎州定去遊草堂方惜別山雨為相留又得一宵話免生千里愁莫辭重卜日後會必驚秋

旅中答喻軍事問客情云一自遊他國相逢少故人縱然為客樂爭似在家貧畜恨霜侵鬢搜詩病入神若非憐片善誰肯問風塵

贈盧逸人云高眠岩野間至藝敵應難詩苦無多首藥
靈惟一九引泉魚落釜攀果露沾冠已得嵇康趣逢迎
事每闌

劉夢得送舉師序云近古而降釋子以詩聞于世者相
踵焉因定而得境故脩然以清由慧而遣辭故粹然以
麗信禪林之騰萼而戒河之珠璣也柳儀曹謂文郁師
背笈篋懷筆牘挾海沂江獨行山林間脩脩然摸狀物
態搜伺隱隙登高遠望悽愴超忽游其心以求勝語若

有程督之者

此一節論浮屠能詩者故載于卷末

唐詩紀事卷七十七

欽定四庫全書

唐詩紀事卷七十八

宋 計敏夫 撰

開元宮人 楊氏女

薛彥輔母林氏

崔氏

劉氏

慎氏

薛媛

李季蘭

侯氏

如意中女子

魚玄機

僖宗宮人

張建封妓

女道士元淳 裴柔之

宮女

開元宮人

開元中賜邊軍纊衣製於軍中有兵士於短袍中得詩
曰沙場征戍客寒苦若為眠戰袍經手作知落阿誰邊
蓄意多添線含情更著綿今生已過也重結後生緣兵
士以詩白帥帥進呈明皇以詩遍示宮中曰作者勿隱
不汝罪也有一宮人自言萬死上深閤之遂以嫁得詩
者謂曰吾與汝結今生緣邊人感泣

楊氏女

盈川姪女曰容華有新粧詩云宿鳥驚眠罷房櫳秉曉

開鳳釵金作鏤鸞鏡玉為臺粧似臨池出人疑月下來
自憐終不見欲去復徘徊

韓彥輔母林氏

送男左貶詩云他日初投杼勤王在飲冰有辭期不罰
積意許相仍謫宦今何在銜冤猶未勝天涯分越徼驟
騎速毗陵腸斷腹非苦書傳寫豈能汨漆江水遠心劇
海雲蒸明月珠難識甘泉賦可稱但將忠報主何懼點

青蠅

彥輔開元時登進士第

右按薛播伯父元曖終於隰城丞其妻濟南林氏丹陽太守洋之妹善屬文有子彥輔彥國彥偉彥雲及播兄據總並早孤悉為林氏訓導立名開元天寶間彥輔劇等七人並舉進士連中科名衣冠榮之

崔氏

盧校書年暮取崔氏結褵之後為詩曰不怨盧郎年紀大不怨盧郎官職卑自恨妾身生校晚不及盧郎年少

時

劉氏
或云趙氏

杜羔不第將至家其妻劉氏先寄詩云良人的的有奇
才何事年年被放回如今妻面羞君面君到來時近夜
來羔即迴尋登第又寄詩云長安此去無多地鬱鬱葱
葱佳氣浮良人得意正年少今夜醉眠何處樓雜言寄
杜羔云君從淮海遊再過杜蘭秋歸來不須更又欲向
梁州梁州秦嶺西棧道與雲齊羗虜萬餘落戟矛自高

低已念寡儔侶復慮勞攀躋丈夫重志氣兒女空悲啼
臨邛滯遊地肯顧濁水泥人生賦命有厚薄君自遨遊
我寂寞羔登貞元年進士第終工部尚書贈右僕射制
云生於士族蘊為公器敦厚孝友本乎天性文學政事
出於餘力自立朝右藹然素風司諫平刑駁議廉問凡
所踐歷不懈于位以年致政以疾就第出處進退皆叶
時中

白樂天之詞也羔有詩附李益門

羔有至性父死河北母不知所

之羔憂號終日後竟得其母又不知其父墓處復得其

墓於佛相柱下後歷振武節度使

慎氏

毗陵慎氏三吏嚴灌夫之妻以無子被出有詩曰當時
心事已相關雨散雲收一餉間便是孤帆從此去不堪
重過望夫山遂如初

雲溪
友議

薛媛

濠梁南楚材旅遊陳頴受頴牧之眷無返舊意其妻薛
媛寫真寄之曰欲下丹青筆先拈寶鏡端已驚顏索寞

漸覺鬢凋殘，
淚眼描將易。
愁腸寫出難，
恐君渾忘却。
時展畫圖看，
夫婦遂偕老焉。
雲溪友議

時人嘲之曰：當時婦棄夫，今日夫棄婦。若不逞丹青空房應獨守。

李季蘭

三峽流泉歌云：
妾家本住巫山雲，
巫山流水常自聞。
玉琴奏出轉寥寞，
直似當時夢中聽。
三峽迢迢幾千里，
一時流入幽闈裏。
巨石崩崖指下生，
飛泉走浪絃中起。
初

疑憤怒含雷風復似鳴咽流不通迴湍曲瀨意將盡時
復滴瀝平沙中憶昔元公為此曲能使仲容聽不足一
彈既畢還一彈願比流泉鎮相續

寄韓校書云無事烏程縣蹉跎歲月餘不知蘭閣吏寂
寞意何如遠水浮仙棹寒暄伴使車因過大雷岸莫忘
八行書

結素魚貽友人云尺素如殘雪結為雙鯉魚欲知心裏
事看取腹中書

得閻伯鈞書云情來對鏡懶梳頭暮雨蕭蕭庭樹秋
莫恠欄杆垂玉筍只緣惆悵對銀鈎

送韓揆之江西云相看指楊柳別恨轉依依萬里江西
水孤舟何處歸湓城潮不到夏口信應稀唯有衡陽鴈
年年來去飛

季蘭五六歲其父抱於庭作詩詠薔薇云經時未架却
心緒亂縱橫父恚曰此必為失行婦也後竟如其言

高仲武云士有百行女有四德季蘭則不然形器既雄

詩意亦蕩自鮑昭已下罕有其倫如遠水浮仙棹寒星
伴使車此五言之嘉境也上方班婕妤好則不足下比韓
英則有餘不以遲暮亦一俊嫗

劉長卿謂季蘭為女中詩豪

侯氏

會昌中邊將張睽防戎十年餘其妻侯氏綉迴文作龜
形詩詣闕進之詩云睽離已是十秋強對鏡那堪重理
粧聞鴈幾回修尺素見霜先為製衣裳開箱疊練先垂

卷之十八
泪拂杵調砧更斷腸綉作龜形獻天子願教征客早還鄉侯氏賜綰三百足以彰才美出抒情詩

如意中女子

如意中女子年九歲能吟詩則天試之皆應聲而就其兄辭去則天令作詩送兄遂賦云別路雲愁起離亭葉正稀所嗟人異鴈不作一行飛出唐宋遺史

裴柔之

元微之自會稽拜尚書右丞到京未踰月出鎮武昌裴

夫人柔之難之曰歲杪到家鄉先春又赴任微之即贈
詩曰窮冬到鄉國正歲別京華自恨風塵眼常看遠地
花碧幢還照曜紅粉莫咨嗟嫁得浮雲婿相隨即是家
柔之答曰侯門初擁節御苑柳絲新不是悲殊命唯愁
別是親黃鶯遷古木珠履從清塵想到千山外滄江正
暮春

魚玄機

臨江樹云草色連荒岼烟姿入遠樓葉鋪秋水面花落

釣人頭根老歲魚窟枝低拂客舟

拂一作傍

蕭蕭風雨夜驚

夢復添愁

玄機咸通中西京咸宜觀女道士也字幼微善屬文其
詩有綺陌春望遠瑤徽春興多又殷勤不得語紅泪一
雙流又焚香登玉壇端簡禮金闕又雲情自鬱爭同夢
仙貌長芳又勝花後以笞殺女童綠翹事下獄獄中有
詩云易求無價寶難得有情郎又云明月照幽隙清風
開短襟

僖宗宮人

唐僖宗自內出袍千領賜塞外吏士神策軍馬真於袍
中得金鎖一枚詩二首云玉燭製袍夜金刀呵手裁鎖
寄千里客鎖心終不開真就市貨鎖為人所告主將得
其詩奏聞僖宗令赴闕以宮人妻真後僖宗幸蜀真晝
夜不解衣前後捍禦

張建封妓

樂天有和燕子樓詩其序云徐州張尚書有愛妓盼盼

善歌舞雅多風態為校書郎時遊淮泗間張尚書宴予
酒酣出盼盼佐歡予因贈詩落句云醉嬌勝不得風嫋
牡丹花一歡而去爾後絕不復知茲一紀矣昨日司勳
員外郎張仲素繪之訪余因吟詩新有燕子樓詩三首
辭甚婉麗詰其由乃盼盼所作也繪之從事武寧累年
頗知盼盼始末云張尚書既歿彭城有張氏舊第中有
小樓名燕子盼盼念舊愛而不嫁居是樓十餘年于今
尚在盼盼詩云樓上殘燈伴曉霜獨眠人起合歡床相

思一夜情多少地角天涯不是長又云北邙松栢鎖愁
烟燕子樓中思悄然自埋劍履歌塵散紅袖香銷一十
年又云適看鴻鴈岳陽迴又覩玄禽逼社來瑤瑟玉簫
無意緒任從蛛網任從灰

余嘗愛其新作乃和之云滿窗明月滿簾霜被冷燈殘
拂卧床燕子樓中寒月夜愁來祇為一人長

鈿帶羅衫色似烟幾回欲起即潛然自從不舞霓裳曲
疊在空箱一十年

今春有客洛陽回曾到尚書墓上來見說白楊堪作柱
忍教紅粉不成灰

又贈之絕句黃金不惜賣娥眉揀得如花四五枝歌舞
教成心力盡一朝身去不相隨後仲素以余詩示盼盼
乃反覆讀之泣曰自公薨背妾非不能死恐百載之後
人以我公重色有從死之妾是玷我公清範也所以偷
生爾乃和白公詩云自守空樓歛恨眉形同春後牡丹
枝舍人不會人深意訝道泉臺不去隨盼盼得詩後往

往旬日不食而卒但吟詩云兒童不識冲天物謾把青
泥汚雪毫出長慶集

宮女

天寶末宮娥衰悴不願脩宮掖有落葉題詩隨御水而
流云舊寵悲秋扇新恩寄早春聊題一紅葉將寄接流
人顧況聞而和之云愁見鶯啼柳絮飛上陽宮女斷腸
時君恩不禁東流水葉上題詩寄與誰既達宸聰由是
遣出禁中者有五使之號焉宣宗朝又有題紅葉隨流

者為盧渥得之詩曰水流何太急深宮盡日閑殷勤謝
紅葉好去到人間

女道士元淳

寄洛中諸姊云舊國經年別關河萬里思題詩憑鴈翼
望月想蛾眉白髮愁偏覺歸心夢獨知誰憑離亂處掩
泣向南枝

唐詩紀事卷七十八

欽定四庫全書

唐詩紀事卷七十九

宋 計敏夫 撰

張夫人

崔仲容

女郎張琰

女郎崔含達

女郎宋若昭

女郎宋若荀

女郎田娥

女郎劉雲

薛濤

女郎葛鵲兒

女郎張文姬

鮑君徽

女郎張窈窕

倡妓常皓

女郎蔣蘊

女郎劉媛

廉氏

彭伉妻

程長文

尼海印

孫氏

鶯鶯

非烟

徐月英

張夫人

吉中學
侍郎妻

拜新月云拜新月拜月出堂前暗魄深籠挂虛弓未引
絃拜新月拜月粧樓上鸞鏡未安臺蛾眉已相向拜新
月拜月不勝情庭前風露清月臨人自老望月更長生
東家阿母亦拜月一拜一悲聲斷絕昔年拜月逞容儀
如今拜月雙淚垂回看衆女拜新月却憶紅閨年少時

崔仲容

贈所思云所居幸接隣相見不相親一似雲間月何殊

鏡裏人丹誠空有恨腸斷不經春願作檠間燕無由變
此身

戲贈云暫到崑崙未得歸阮郎何事教人非如今身佩
上清錄莫遣落花沾羽衣

贈歌妓云水剪雙眸霧剪衣當筵一曲媚春輝瀟湘夜
色怨猶在巫峽晚雲愁不稀皓齒乍分寒玉細黛眉輕
蹙遠山微渭陽朝雨休重唱滿眼陽關客未歸

女郎張琰

春詞云垂柳鳴黃鸝間關若求友春晴不可耐愁殺閨
中婦日暮登高樓誰憐小垂手昨日桃花飛今日梨花
吐春色能幾時那堪正愁緒蕩子遊不歸春來淚如雨

女郎崔公達

獨夜詞云晴天霜落寒風急錦帳羅幃羞更入秦箏不
復斷續絃回身掩淚挑燈立

女郎宋若昭

和御製麟德殿宴百僚云垂衣臨八極肅穆四門通自

是無為化非闕輔弼功修文招隱伏尚武殄妖兇德炳
韶光熾恩沾雨露濃衣冠陪御宴禮樂盛朝宗萬壽稱
觴舉千官信一同

若昭貝州人父廷芬生五女皆警慧善屬文長若華次
若昭若倫若憲若荀若昭文尤高皆性素潔鄙薰澤靚
粧不願歸人欲以學名家家亦不欲與寒鄉凡裔為姻
對貞元中昭義節度使李抱真表其才德宗召入禁中
試文章并問經史大義帝咨美悉留宮中帝能詩每與

侍臣賡和五人者皆預又高其風操不以妾侍命之呼
學士自貞元七年秘禁圖籍詔若華總領元和末卒後
穆宗拜若昭尚官嗣其秩歷穆恭文三朝皆呼先生若
憲文宗時以讒死倫荀早卒廷芬男獨愚不可教為民
終身

女郎宋若荀

和御製麟德殿宴百僚云端拱承休命時清荷聖皇四
聰聞受諫五服遠朝王景媚鶯初轉春殘日更長命筵

多濟濟盛樂復鏘鏘
豐鎬誰將敵橫汾未可方
願齊山嶽壽祉福永無疆

女郎田娥

寄遠云憶昨會詩酒終日相逢迎
今來成故事歲月令人驚
泪流紅粉薄風度羅衣輕
難為子猷志虛負文君名

女郎劉雲

有所思云朝亦有所思暮亦有所思
登樓望君處靄靄

蕭關道掩淚向浮雲誰知妾懷抱玉井蒼苔春院深桐
花落盡無人掃

薛濤

罰赴邊有懷上宰相公云聞道邊城苦而今到始知却
將門下曲唱與隴頭兒元微之贈濤詩因寄舊詩與之
云詩篇調態人皆有細膩風光我獨知月夜詠花憐暗
淡雨朝題柳為歌垂長教碧玉藏深處總向紅牋寫自
隨老大不能收拾得與君開似教男兒

濤好製小詩惜其幅大狹小之蜀中號薛濤牋或以營妓無校書之號韋南康欲奏之而罷後遂呼之胡曾詩曰萬里樓臺女校書批把花下閉門居掃眉才子知多少管領春風總不如進士楊蘊中下成都獄夢一婦人曰吾薛濤也贈詩云玉漏深長燈耿耿東牆西牆時見影月明窻外子規啼忍使孤魂愁夜永

女郎葛鵲兒

懷良人云蓬鬢荆釵世所稀布裙猶是嫁時衣胡麻好

種無人種正是歸時不見歸

河北士人間亦有之未知孰是

女郎張文姬

溪口雲云一片溪口雲纔向溪中吐不復歸溪中還作

溪中雨

沙上鷺云沙頭一水禽鼓翼揚清音只待高風便非無

雲漢心

鮑君徽

閑宵對月茶宴云閑朝向晚出簾櫳茗宴高亭四望通

遠眺城池山色裏俯聆絃管水聲中
幽篁映沼新抽翠芳桂低簷晚吐紅
坐久此中無限興可憐團扇起清風

女郎張窈窕

寄故人云淡淡春風花落時不堪愁望更相思
無金可買長門賦有恨空吟團扇詩

窈窕居於蜀當時詩人雅相推重有上成都在事詩曰
昨日賣衣裳今日賣衣裳渾賣盡羞見嫁時箱有
賣愁仍緩無時心轉傷故園有虜隔何處事蠶桑

倡妓常浩

贈盧夫人云佳人惜顏色恐逐芳菲歇日暮出畫堂下
堦見新月拜月仍有詞傍人那得知歸來玉臺下始覺
泪痕垂

女郎蔣蘊

彥輔之孫

一作韻

贈鄭女郎古意云昨夜巫山中失却陽臺女朝來香閣
裏獨伴楚王語艷陽灼灼河洛神珠簾綉戶清樓春能
彈箜篌弄纖指愁殺門外少年子笑開一面紅粉粧東

園幾處桃花死朝理曲暮理曲獨坐窓前一片玉行也
嬌坐也嬌見之令人魂魄銷堂前錦褥紅地鑪綠沉香
揔傾屠蘇解佩時時歇歌管芙蓉帳裏蘭麝滿晚起
羅衣香不斷滅燭每嫌秋夜短

女郎劉媛

長門怨云雨滴梧桐秋夜長愁心和雨到昭陽泪痕不
學君恩斷拭却千行更萬行

又云學畫娥眉獨出羣當時人道便承恩經年不見君

王面花落黃昏空掩門

女郎廉氏

峽中即事云清秋三峽此中去鳴鳥孤猿不可聞一道
水聲多亂石四時天色少晴雲日暮泛舟溪淑口那堪
夜永思氛氲

彭伉妻

彭伉評事宜陽微君之孫及第後江西廉使于公辟入
幕歲久未回妻張氏寄二絕其一云久無音信到羅幃

路遠迢迢遣問誰問君折得東堂桂折罷那能不暫歸
其二云驛使今朝過五湖殷勤為我報狂夫從來誇有
龍泉劍試割相思得斷無

彭伉始以詩寄之曰莫訝相如獻賦遲錦書誰道泪沾
衣不須化作山頭石待我東堂折桂枝

程長文

書情上使君云妾家今住鄱陽曲一片堅心比孤竹當
年二八盛容儀紅牋草隸恰如飛盡日閑窻刺綉坐有

時極浦採蓮歸誰道居貧守都邑幽居寂寞無人入海
鷺朝歸枕席寒山花夜落堦墀濕強暴之男何所為手
持白刃向簾幃一命任從刀下死千金豈受閭中欺我
心匪石情難轉志奪秋霜意不移血濺羅衣終不恨瘡
粘錦綉亦何辭縣僚曾未知情緒即便教人繫圈圈朱
唇滴瀝獨銜冤玉筋闌干歎非所十月寒更堪思人一
聞擊柝一傷神高髻不梳雲已散蛾眉罷掃月仍新三
尺嚴章難可越百年心事向誰說但看洗雪出圜扉始

信白玉無點缺

尼海印

蜀慈光寺尼海印唐末人才思清峻有舟夜一章云水
色連天色風聲益浪聲旅人歸思苦漁叟夢魂驚舉棹
雲先到移舟月逐行旋吟詩句罷猶見遠山橫

孫氏

進士孟昌期之妻也代夫作白蠟燭詩贈人云景勝銀
缸香比蘭一條白玉偏人寒他時紫禁春風夜醉草天

書仔細看

又琴詩云玉指朱絃軋復清湘妃愁怨最難聽初疑颭
颭涼風勁又似蕭蕭暮雨零近若流泉來碧嶂遠如空
鶴下青冥夜深彈罷堪惆悵霧濕叢蘭月滿庭

謝人送酒云謝將清酒寄愁人澄澈甘香氣味真好是
綠窻風月夜一盃搖蕩滿懷春三詩皆代夫之作一旦
曰才思非婦人之事也併焚其集

鴛鴦

鷓鴣鷓鴣姓崔氏有張生者託其婢紅娘以春詞二篇誘之
崔答曰待月西廂下迎風戶半開拂墻花影動疑是故
人來張喜其意既遇而別崔命瑟鼓霓裳羽衣之曲張
文戰不利崔貽書以廣其意又有竹茶碾亂絲之贈曰
汨痕在竹愁緒縈絲因物達情永以為好揚巨源元微
之善張生見其書歎賞之巨源賦崔娘一篇云清潤潘
郎玉不如中庭蕙草雪銷初風流才子多春思腸斷蕭
娘一紙書元微之亦續生會真詩三十韻張後以為妖

於身也絕之既而經其所居崔潛寄一詩云自從消瘦
減容光萬轉千回懶下床不為傍人羞不起因郎憔悴
却羞郎

張將行賦一章以絕之云棄置今何道當時且自親還
將舊來意憐取眼前人自是遂絕

非烟

臨淮武公業任河南參軍有愛妾非烟姓步氏善文章
工擊甌北隣有趙子以詩誘之曰一覩傾城貌塵心只

自猜不隨簫史去擬學阿蘭來非烟答曰綠慘嬌蛾不
自持只緣憂恨在新詩郎心應似琴心怨脉脉春情更
付誰趙又曰珍重佳人惠好音綵牋花翰兩情深薄於
蟬翼誰供眼密似蠅頭未寫心疑是落花還碧洞又思
輕雨滿幽襟百回消息千回夢裁作長謠寄綠琴非烟
偶病旬日方答之云無力嚴粧倚綉攏聊題蟬錦思無
窮

以連蟬錦
香囊贈趙

近來贏得傷春病柳弱花欹怯晚風後乃

踰垣相從趙有十洞三清難阻路有心還得傍瑤臺之

句非烟答曰相思何似不相識相見還將却別君公業
後知董殺之趙竄於江淮公業麴悍故非烟有媒
盼所欺匹合獷類之語

徐月英

月英江淮間娼也送人詩云惆悵人間萬事違兩人同
去一人歸生憎平望亭前水忍照鴛鴦相背飛又云枕
前泪與塔前水隔箇閑窗滴到明亦有詩集行于世

唐詩紀事卷七十九

欽定四庫全書

唐詩紀事卷八十

宋 計敏夫 撰

河北人

不知名

僕

新羅主

楊彥鯤

不知名

權龍褒

河北士人

朱滔以士族應募問一士人所業曰學為詩有妻乎曰有之令作寄內詩即曰握筆題詩易荷戈征戍難慣從鴛被暖怯去鴈門寒瘦盡寬衣帶題多清枕檀試留青

黛着盡日畫眉看又令代妻答曰蓬鬢荆釵世所稀布
裙還是嫁時衣胡麻好種無人種正是歸時不見歸

本出

詩事

不知名

江陵有士子遊交廣五年未還愛姬為太守所取納於
高麗坊底及歸寄詩曰陰雲幕幕下陽臺惹着襄王更
不迴五度看花空有泪一心如結不曾開纖蘿自合依
芳樹覆水寧思返舊杯惆悵高麗坊底宅春光無復下

山來守遂遣還有為御史分務洛京者其愛姬為逢吉
一閉遂不復出明日以詩投之云三山不見海沉沉豈
有仙蹤尚可尋青鳥去時雲路斷嫦娥歸處月宮深紗
窗暗想春相憶書幌誰憐夜獨吟料得此時天上月只
應偏照兩人心李得詩含咲曰大好詩遂絕

唐人及第後或遇舊題名處即加前字故詩曰曾題名
處加前字送出城人乞舊詩

姚合及第後詩曰新街
添一字舊友讓前途

長

安木塔院有進士房曾題名處有人題詩曰姚家新塔

是房郎未解芳顏意欲狂見說正調穿羽箭莫交射破
寺家墻丹陽焦山瘞鶴銘傍小碣刻詩云江外水不凍
今年寒苦遲三山在何許欲到引風歸后題云丹陽掾
王瓚作後復得小石云縱步不知遠夕陽猶未回好花
隨處發流水趁人來不知誰為之

傳聞天子訪沉淪萬里懷書西入秦早知不用無媒客
恨別江南楊柳春

顧陶類詩云
不知名氏

僕

咸陽郭氏之僕捧劍者有詩曰青鳥銜蒲萄飛上金井
欄美人恐驚去不敢捲簾者

又題牡丹云一種芳菲出後庭却輸桃李得佳名誰能
為向天人說從此移根近太清後耻為奴隸逃走有詩
曰珍重郭四郎臨行不得別晚漏動離心輕車冒殘雪
欲出主人門零涕暗嗚咽萬里隔關山一心思漢月京
兆司錄全曉述此事以語李蹊

雲溪友議

孫願唐貞元已後三代為池陽刺史有戟門門子朱元

迎道左獻詩曰昔日郎君今刺史朱元依舊守朱門今
朝行馬諸童子盡是當時竹馬孫

新羅主

太宗立新羅主善德妹真德為王永徽元年真德大破
百濟之衆遣其弟法敏以聞真德乃織錦作五言太平
頌以獻之其詞曰大唐開洪業巍巍皇猷昌止戈戎衣
定脩文繼百王統天崇雨施理物休含章深仁諧日月
撫運邁陶唐幡旗何赫赫鉦鼓有鐺鐺外夷違命者剪

覆被天殃淳風疑幽顯遐邇競呈祥四時和玉燭七曜
巡萬方維岳降宰輔維帝任忠良五三成一德昭我皇
家唐帝嘉之

楊奇鯤

奇鯤南詔大酋之心膺也僖宗時來朝高駢自淮海飛
章曰蠻酋用事唯奇鯤等數人請止而鴟之帝用其策
奇鯤有詞藻途中詩云風裏浪花吹又白雨中嵐影洗
還青沙鷗住處窻前見林狔啼時枕上聽

出北夢
瑣言

不知名

雜調云勸君莫惜金縷衣勸君須惜少年時有花堪折
直須折莫待無花空折枝

青天無雲月如燭露泣梨花白如玉子規一夜啼到明
美人獨在空房宿

石沉遼海濶劍別楚山長會合知無日離心滿夕陽
空賜羅衣不賜恩一燠香後一銷魂雖然舞袖何曾舞
長對春風裊淚痕

不洗殘粧凭綉床却嫌鸚鵡綉衣裳迴針刺到雙飛處
憶昔征夫泪數行

眼想心思夢裏驚無人知我此時情不如池上鴛鴦鳥
雙宿雙飛過一生

一去遼陽繫夢魂忽傳征騎到中門紗窗不肯施紅粉
圖遣蕭郎問泪痕

鶯啼露冷酒初醒卷盡樓西曉角鳴翠羽帳中人夢覺
寶釵斜墜枕函聲

行人南北分征路流水東西接御溝日日波前怨離別
謾名長樂是長愁

偏倚綉床愁不起雙垂玉筍翠環低卷簾相待無消息
夜合花開日又西

悔將泪眼向東開特地愁從望裏來三十六峰猶不見
況伊如燕這身材

滿目笙歌一段空萬般離恨總隨風多情為謝殘陽意
與展晴霞片片紅

兩心不語暗知情燈下裁縫月下行行到塔前知未睡
夜深聞放剪刀聲

六言詩云把酒留君聽琴那堪歲暮離心霜葉無風自
落秋天不雨多陰人愁荒村路遠馬怯寒溪水深望盡
青山猶在不知何處相尋

美人騎馬云駿馬嬌仍穩春風霸岸晴從來金蹬短扶
上玉人輕帽束雲鬟亂鞭籠翠袖明不知從此去何處
更傾城

乾符未有客訪僧僧却之題門而去云龕龍去東海時
日隱西斜敬丈今不在碎石入流沙忽一僧曰大罵我
曹乃合寺苟卒四字

鴈塔詩云漢國山河在秦陵草樹深暮雲千里色何處
不傷心傍書云荆叔偶題不知何人也

盧常侍牧章江一曹生令為從事曹悅營妓丹霞盧不
許會餞朝客曹有詩曰拜玉亭前閑送客此時孤恨感
離鄉尋思往歲絕纓事肯向朱門泣夜長盧演為長句

云桑扈交暉百舌忙。祖亭同樂陪。思鄉樽前有恨同。卑
官席上無聊發。靚粧莫與狂花迷。眼界須求真理定。心
王遊蜂採掇何時已。却恐多言議短長。令丹霞改令罰
曹丹霞乃號之為怨胡天。以曹狀類胡滿座大笑。盧因
目丹霞為怨胡婦。盧氏子失弟徒步及都城門來寒甚
有一人續至附火吟曰。學織綾羅功未多。亂拈機杼錯
拋梭。莫教宮錦行家見。把此文章笑殺他。遂云。如今不
重文章士。莫把文章誇。向人盧愕然以為樂天詩。問姓

名曰姓李世纖綾錦前屬東都宮錦坊宮錦巧兒以薄技投本行皆云如今花樣與前不同不謂伎倆兒以文彩求售者不重於世且東歸去

權龍褒

景龍中為左武將軍好賦詩而不知聲律中宗與學士賦詩輒自預焉帝戲呼為權學士初以親累遠貶泊歸獻詩云龍褒有何罪天恩放嶺南勅知無罪過追來與將軍上大笑嘗吟夏日詩嚴雪白皓皓明月赤團團或

曰豈是夏景答曰趣韻而已通天中刺滄洲初到呈同
官曰遙看滄洲城楊柳鬱青青中央一羣漢聚坐打杯
觥諸公謝曰公有逸才曰不敢趣韻而已嘗作秋日休
懷詩曰簷前飛七百雪白後園疆飽食房裏側家糞集
野娘參軍不曉問之權曰鷄子簷前飛直七百洗衫掛
後園白如雪飽食房中側臥家裏便轉集得野澤蠅娘
聞者嗤之始賦夏日嚴霜明月之句乃皇太子宴賦詩
太子援筆譏之曰龍褒才子秦州人士明月晝耀嚴雪

夏起如此詩章趣韻而已

龍褒為瀛洲刺史歲暮京州人附書云改年多感乃將書呈判司以下云有司改年為多感元年一日謂府吏何名私忌對曰父母忌日請假偶房中靜坐有青狗突入大怒曰衝破我忌更牒改到明日好作忌日談者笑之

唐詩紀事卷八十

欽定四庫全書

唐詩紀事卷八十一

宋 計敏夫 撰

毛仙翁贈行詩

裴度云爰自荊州鼎成黃金道息封固真粹教不流傳
代歷秦漢言者恠濶先儒以為繫風捕影誰抵其實琅
邪論衡詳之矣予嘗以為斯言之未盡其臧否也及見
仙翁勃達前聞且嗇神胎元抱和含真默然道風煦然
如春追柱擗色將數百歲光陰自駛寒暑不易鑪鎚之

間物無不化養之在我得之自然加以熊經鳥伸玄藏
城府閉合默識孰窺崇墉當今勢位壓山河器業橫覆
載皆面嚮傾就誠布乎辭度不知先儒誰談其無乎得
食馬肝者豈為知味耶圖鬼神者易為工耶不復知總
總化昭而已仙翁將去追遺雲蹤苟非造物者不能以
識裴度述

僧孺云僧孺見仙翁兄深仰其為真人也僧孺讀史傳
嘗病仙者能上升鄙見也斯不然僧孺聞胡國西胡法

至其將歿之日必大會族黨州里衆其人齋其食人則
飄飄而發地焉數百里外而墜窮谷中國中人咸謂曰
化子焉知非胡國之幻乎今兄不離世間而出世間浩
蕩乎嗜慾之境蹂躪乎人情之圃三事五侯躬擁篲于
門獲禮仙翁者為榮不獲禮為羞況雙眸晃然紅膚若
花迅駭無羈束步飄飄然予安謂其非至人乎昔昌黎
韓公侍郎掌國裴李二相府皆命世之大賢與兄文字
不曰師則曰丈予又焉測兄之壽耶嵇君著養生一篇

以中才用心養其性命斯為勝矣腥者吾食諸稔者吾食諸憊於我者食諸又不測兄之玄妙也至於煮鍊金石妙至先覺若指乎掌不為能事賄利軒冕故無不明於心劉郎之骨非凡目所測大和三年秋九月偶拜遇兄於夏口眷予塵俗授之玄記又約僧孺為道弟所訝真步超遙白雲無繫要他日為拜會之資僧孺抽毫以叙離恨題文曰別志且用契異時之語焉

李翱云紫霄仙客下三山因救生靈到世間龜鶴計年

承甲子冰霜為質駐童顏
韜藏休咎傳真錄
變化榮枯試小還
從此更教塵骨貴
九霄雲路願追攀

令狐楚云宣州渾是上
清宮
客有真人貌似童
紺髮垂纓光鬢細
髯綠領綠茸
壺中藥物梯霞訣
肘後方書縮地功
既許焚香為弟子
願教年紀共椿同

李程云茫茫塵累愧腥膻
強把蜉蝣望列仙
閑指紫霄峰下路
却歸白鹿洞中天
吹簫鳳去經何代
茹玉方傳得幾年
他日更來人世看
又應東海變桑田

李玄閔云不知仙客占青春肌骨纔教稱兩旬俗眼暫
驚相見日疑心未測幾時人閑推甲子經何代笑說浮
生老此身殘藥儻能沾朽質願將霄漢永為憐

韓愈云仙翁姓毛氏名于姬與韓為族愈末年為弟也
相識於湖陽逆旅叙宗焉察其言不由乎孔聖道不由
乎老莊教而以慧性知人爵祿厚薄壽命長短發言如
駛駟嘖嘖持疑於唇吻間即信乎異人也若古之許負
輩不足言哉然兄言果有證期愈自與袁州從袁州除

國子祭酒後主兵部事續拜京兆尹又改吏部郎中若
如言即掃廳屋候兄一日歡笑質亦不朽之名也酒酣
留詞走筆而成不能采其文章之要也時元和十四年
己亥四月十六日族弟門人韓愈序

崔郾云存亡去住一壺中兄事安期弟葛洪甲子已過
千歲鶴儀容方稱十年童心靈暗合行人數藥力潜均
造化功終待此身無繫累武陵山下等黃公

王起云冰霜肌骨稱童年羽駕何由到俗間丹竈化金

留秘訣仙宮嗽玉叩玄關壺中世界青天近洞裏烟霞
白日閑若許隨師去塵網願陪鸞鶴向三山

李益云玉潤溶溶仙氣深含光混俗似無心長愁忽作
鶴飛去一片孤雲何處尋

鄭澣云至道無名至人長生爰觀繪事似挹真形方口
渥丹濃眉刷青松姿本秀鶴質自輕道德神仙內蘊心
靈紅肌綠髮外彰華清色如含芳貌若和光胚渾造化
吐納陰陽吾聞安期隱見不常或在世間或遊上蒼猗

歟真人得非後身寫此仙骨久而不磷皎皎明眸瞭然
如新藹藹童顏的然如春金石可並丹青不泯通天臺
上有見常人俗士觀瞻方悟出塵君子圖之敬兮如神
揚於陵云先生赤松侶混俗遊人間崑閬無窮路何時
下故山千年猶孺質秘術救塵寰莫便冲天去雲雷不
可攀

揚嗣復云天上玉郎騎白鶴肘後金壺成妙藥暫遊下
界傲五侯重看當時舊城郭羽衣茸茸輕似雪雲上雙

童持絳節王母親縫紫錦囊令向懷中藏秘訣令威子
晉皆儔侶東嶽同尋太真女搜奇綴韻和陽春文章不
是人間語藥成自固黃金骨天地齊分身不歿日月宮
中便是家下視崑崙何突兀童姿玉貌誰方比玄髮綠
髯先瀾瀾滿朝將相門弟子隨師盡願拋塵滓九轉琅
玕必有餘願乞刀圭救生死

元微之云余廉問浙東歲毛仙翁惠然來顧越之人士
識之者相與言曰仙翁常與葉法善吳筠遊於稽山迨

茲多歷年所而風貌愈少蓋神仙者也余因得執弟子
之禮師其道焉余常見圓冠方領之士讀道書疑其絕
聖智棄仁義謂斯書不足以經世理國殊不知至人無
兼受智人又無裁非大樂同天地之和大禮同天地之
節其可臻乎上德宜乎大道之致華胥終北之化熙熙
然也又以徐市文成之事謂方士之流誕妄於世不足
以為教也殊不知峒山高卧汾水凝神怡心傲世藐然
物外至五侯不可得師友也若然則徐市之羨不足以

害嘉穀文成之誕不足以傳大教今我仙翁真風遺骨
玄格高情冥鴻孤鶴不可方喻蓋峒山汾水之儔也一
言而道合止于山亭三日而南棲天台謂余曰入相之
年相候於安仁里余拜而言曰果如仙約燃香拂榻以
俟雲駕焉杼詩一章以為他日之志也

仙駕初從蓬島來相逢又說向天台一言親授希微訣
三夕同傾沆瀣杯此日臨風飄羽衛他年嘉約落鹽梅
花前揮手超遙去目斷霓旌不可陪

沈傳師云安期何事出雲烟為把仙方與世傳只向人間稱百歲誰知洞裏過千年青牛到日迎方朔丹竈開時共稚川更說桃源更深處異花長占四時天

崔元畧云莫將凡聖比雲泥椿菌之年本不齊度世無勞大稻米昇天只用半刀圭人間嗟對黃昏槿海上閑聽碧落鷄旌節行中令引道便從塵外蹈丹梯

柳公綽云桃源千里遠花洞四時春中有含真客長為不死人松高枝葉茂鶴老羽毛新莫遣同籬槿朝榮暮

化塵

白居易云仙翁已得道混跡尋岩泉肌膚冰雪淨衣服
雲霞鮮紺髮絲並綴韶容花共妍方瞳點玄漆高步凌
非烟幾見桑田變莫知龜鶴年所憇九霄外所遊五嶽
巔軒昊舊為侶松喬難比肩每嗟人世入役役如狂顛
孰能脫羈鞅盡遭利名牽貌隨歲華換神逐光陰遷唯
余負憂譴憔悴盜江壖衰鬢忽霜白愁腸如火煎羈旅
坐多感徘徊私自憐晴眺五老峰玉洞多神仙何當憫

湮厄授道安虛辱我師惠然來論道窮重玄浩蕩八溟
濶志泰心超然形骸得無束得喪亦都捐豈識椿菌異那
知鵬鷃懸丹華既相付促景定當延玄功曷可報感極
唯勤拳霓旌不可駐又歸武夷川語罷倏然別孤鶴升
遙天賦詩叙明德永續步虛編

李紳云憶昔我祖神仙主玄元皇帝周柱史曾師軒黃
友堯湯混跡和充佐周武周之天子無仙氣成武康昭
都督爾穆王粗識神仙事八極輪蹄方逞志鶴髮韜真

世不知日月星辰幾回死金鼎作丹丹化碧三萬六千
神入宅仙兄受術幾千年已是當時駕鴻客海光悠容
天路遠春風玉女開宮苑紫筆親教書姓名玉皇詔刻
青金簡桂窻一別三千春秦妃鏡裏蛾眉新忽控香虬
天上去海隅劫石霄花塵一從仙駕辭中土頑日昏風
老無主九州爭奪無時休八駿垂頭避豺虎我亦玄元
千世孫眼穿望斷蒼烟根花麟白鳳竟冥冥飛春走月
勞神昏百年命促奔馬疾愁腸盤結心摧碎今朝稽首

拜仙兄願贈丹砂化秋骨

劉禹錫唐長慶元祀壬寅秋九月止鄂州官舍時風勁
秋寒掩關無事月晦前三日有異客毛仙翁至禹錫攝
衽見之眸容秀目精貌輝然初莫之測坐久語及裴相
國晉公韓祭酒文公皆為方外之交嘗有述序今因請
焉齋心拭目盡得披諷知仙翁之道非人間人也拜請
延留奉以師禮欣然見許止余所止凡七晝夜師之異
者故不可窮其大推裴韓二公具述矣不能復書其察

人吉凶貴賤壽夭或假寐自生死雖百年之變窮通修短皆俊發利詞指陳毫釐無疑忌語堅意真聞之者失色則果然符契于意其神授乎其智知乎至於金火飛伏之道鍊魂御氣之訣吾又莫得而窮之矣嗟乎禹錫之生蹇厄以至羈沉遇師之目謂其有人爵之望可至人臣則鄙誠豈敢企望但師之道多隱晦人不能盡知況仁義惻憫時又甚焉真乎出世者也今將適桃花溪訪秦人追羽客臨風再拜謹志大畧以脩他日之約其

年九月二十九日門人劉禹錫述

禹錫時赴和州於武昌縣喜再遇十八兄仙翁因成絕
句武昌山下蜀江東重向仙舟見葛洪又得案前親禮
拜大羅仙訣玉函封

張仲方云毛仙翁毛仙翁容貌常如二八童幾歲頭梳
雲鬢綠無時面帶桃花紅眼前人世閱滄海肘後藥成
辭月宮方口綉眉編貝齒瞭然炁炁雙瞳子芝椿稟氣
本堅強龜鶴計年應不死四海五山長獨遊矜貧傲富

欺王侯靈通指下甄甓化瑞氣爐中金玉流定是烟霞
列仙侶暫來塵俗救危苦紫霞妖女瓊華飛秘法處心
傳付與陰功足陰功成羽駕何年歸上清待我休官了
婚嫁桃源洞裏覓仙兄

杜光庭云毛仙翁者名干字鴻漸得久視之道不知其
甲子常如三十許人其顴容穉姿雪肌玄髮若處子焉
周遊湖嶺間常以丹石攻疾陰功救物受其賜者不可
勝紀大中戊寅歲進士張為薄遊長沙落魄數載以詩

酒自得不汲汲於隨計一但值女奴於岳麓山下若豪
家之青衣焉奔而歸之張遽感焉歲餘寢成羸疾尫瘠
骨立待時而已毛翁自海陵來泊于道族即張所止也
請謁之者逡巡盈門皆曰尊師十年二十年一屆于市
人仰其惠猶夏之陰冬日之陽也蒙其澤者多矣顧見
張慙之曰子妖氣邪光浹遍肌骨苟不相值殞於旦夕
也吾有鮑南海凡可數百步張之魅妾長號一聲蹙然
而斃因共視之即木偶人也心下至足肌肉如人心上

至頂猶木偶之狀衆共異之棄于江中師曰此魅逝矣
子之性命可全形骸可保也又以丹砂三粒其狀黍米
命張吞之旬月之間肌豐力倍憊疾都瘳師忽告去不
言所之張遂為詩別焉其畧云羸形感神藥削骨生豐
肌蘭炷飄靈烟妖怪立誅夷重覩日光何報父母慈
黃河濁滾滾別泪流澌澌黃河清有時別泪無收期自
是別去莫知所適江湘間至今以為口實張進士亦南
入臺山訪道而去今觀朝彥贈仙翁文集果符長沙之


事裴晉公度牛公僧孺令狐公楚李公程李公宗閔李
公紳揚公嗣復揚公於陵王公起元公微之當代之賢
相也白公居易崔公郾鄭都尉澣李公益張公仲方沈
公傳師崔公元略劉公禹錫柳公公綽韓公愈李公翱
當代之名士也望藹寰區名動海島或師以奉之或兄
以事之皆以師為上清品人也或美其登仙出世或紀
其孺質嬰姿或異其藏往知來者或叙其液金水玉霞
綺交爛組綉相宣蓋玄史之盛事也自元和洎太中戊

子五十餘年容色不改信非常人矣奇章公獨以上昇
為疑者乃拘教守常未達神仙之深旨矣夫仙之上者
骨肉昇飛與天無極又九天之上無何之鄉為極陽之
都神仙之府也世之得道者煉陰而全陽陰滓都盡陽
華獨存故能上賓于天與道冥合則黃帝駕龍而騰躍
子喬控鶴而飛翔赤松乘雨而飄飄列冠馭風而上下
史簡昭著又何疑焉所云胡國胡法將終之事是設幻
化之誣詞謗神仙之輕舉者有是焉耳嘗試論之真一

既判元精肇分清氣為人謂之三才皆稟於妙無成於
妙有人之生也參天而兩地與氣為一天地所以長存
者無為也人所以生化者有為也情以動之智以役之
是非以感之喜怒以戰之取捨以弊之馳騖以勞之氣
耗於內神疲於外氣竭而形衰形凋而神遊以至於死
矣故曰委和而生委順而死率以為常也脩道之士黜
嗜慾隳聰明凝然無心沈然無味收視反聽萬慮都冥
然後虛室生白吻合自然觀化之初窮物之始浩然動

息與道為一矣與道為一則恣心所之從心所欲是非不能亂勢利不能誘寒暑不能變生死不能干指顧乎八極之外逍遙乎六虛之表無所不察無所不知目能洞視耳能洞聽亦能視聽不由乎耳目何者神鑒於未然智通於無極也如此則世人之休咎壽夭富貴貧賤皎然在目豈俟乎陰陽之數著龜之兆而後知之乎毛仙翁則其人也衆君子歌詩志之序述讚之曷足盡仙翁之道暨仙翁之美哉因以神仙之事迹紀仙翁之功

因書于卷末云通正元年丙子三月七日辛酉杜光庭
序



唐詩紀事卷八十一